

光緒山西通志

名宦錄六

錄一之六

山西通志第一百六

賜進士出身頭品頂戴兵部侍郎兼都察院右副都御史巡撫山西提督軍務張煦奉

旨監修

守令

宋至元

王明字如晦大名成安人周廣順初北漢寇晉州命藥元福將兵禦之事多諮於明先是州縣吏部送丁壯餉糧多遁去元福怒盡驅官吏出軍門將就戮明馳往止之曰今軍儲無闕丁夫數萬入文吏儒不能制斬之何益不如寬以待之賊敗凱旋公無專殺之名不亦善乎元福感悟悉免其死既而漢軍背遁卽命元福鎮晉州奏署明爲書記賜緋魚朱開寶中平嶺南江南功尤著雍熙四年知并州晉秩禮部侍郎卒李若谷字子淵徐州豐人第進士真宗時以樞密直學士知

并州民貧失婚姻者出私錢助其嫁娶贅壻亡賴委妻去爲
立期不還許更嫁并多降人喜盜竊若谷籍累犯者三人爲
保有犯并坐之悛者削去籍名尋召知開封府拜參知政事
致仕卒諡康靖

韓琦字稚圭相州安陽人舉進士第二慶厯中累拜樞密副
使請外再遷武安軍節度使知并州承受廖浩然怙中貴勢
貪恣既誣逐前帥李昭亮所爲益不法琦奏還之上命轍詣
本省遼人冒占天池廟地琦召其豪帥示以曩目所求修廟
檄無以對遂歸地既又侵耕陽武砦地琦鑿塹立石以限之
始潘美鎮河東患寇鈔令民悉內徙而空塞下不耕於是忻
代甯化火山之北多廢壤琦以爲此皆良田不耕適足以資
敵遂請距北界十里爲禁地其南則募弓箭手居之墾田至

九千六百頃嘉祐元年召拜樞密使三年拜同平章事治平中封魏國公神宗初除鎮安武勝軍節度使司徒兼侍中判相州熙寧八年卒發兩河卒爲治冢贈尙書令諡忠獻配享英宗廟後贈魏郡王

王拱辰字君貺開封咸平人舉進士第一爲翰林學士遼使劉六符來求關南地斥太平興國舉兵爲無名舉朝莫知所答拱辰曰王師征河東遼旣通使而寇石嶺關以援賊遂因軍伐之豈謂無名乃作報書曰旣交石嶺之鋒遂起雁門之役遼得報繼好如初上喜謂輔臣曰非拱辰深練故實殆難答也後知并州元豐初以宣徽南院使判大明府時河東等三路籍民爲保甲抗言曰非止困其財力奪其農時是以法驅之使陷於罪罟也浸淫爲大盜其兆已見縱未能盡罷願

裁損下戶以紓之於是第五等戶得免卒諡懿恪

馮京字當世鄂州江夏人舉進士自鄉舉禮部至廷試皆第一英宗時以端明殿學士知太原府神宗立召爲翰林學士擢樞密副使時河東麟府豐三州城壘兵械不治官吏皆受譴京以先帥本道上章自劾曰使諸路帥臣知其雖一時脫去後能倖竊名位者猶必行法將不敢復偷惰曠職優詔不聽晉參知政事出外又召知樞密院事致仕卒諡文簡京爲郡守諸縣公事報下捷疾一無壅滯人服其敏云

王素字仲儀華人太尉旦季子賜進士出身熙甯初以端明殿學士知太原府汾河大溢素曰若壞不晉遂灌州城矣亟命具舟楫築堤以塹之一夕水驟至人賴以安入知通進銀臺司致仕卒諡懿敏

呂公弼字寶臣夷簡子賜進士出身治平中拜樞密副使神宗進樞密使將論新法罷爲觀文殿學士知太原府韓絳宣撫秦晉築囉兀城令河東發兵二萬趨神堂新堡公弼曰虜必設伏以待永和關雖回遠可安行乃由永和旣而新路援兵果遇伏詔褒之又拓麟州城包淮沙泉於中以疾請知鄭州後拜宣徽南院使卒諡惠穆

鄭戢字天休蘇州吳縣人師事楊億舉進士甲科仁宗時同知樞密院改副使罷爲資政殿學士累知并州道改鄆又以大學士知并州遼方與元昊交兵邊奏互上獨戢不以聞詔遣使問之對曰敵自相攻中國不足憂也河東行鐵錢山多炭鼓鑄利厚重辟不能止戢請三當一令旣下兵民扇動羣譟州門不得入戢聞悉召至廷下推首謀者數十人黥隸他

州事乃定終宣徽北院使謚文肅

張若谷字德繇南劍沙縣人第進士仁宗時以右諫議大夫知并州先是麟府歲以繒錦市番部馬前守輒罷之若谷以爲互市所以利戎落而通番情且中國得戰馬亟罷之則猜阻不安奏復市如故而馬入歲增後以尙書左丞致仕卒若谷所至有循良蹟不激訐取名云

高繼宣瓊次子善騎射知讀書康定中授恩州團練使知并州初元昊叛聲言侵關隴繼宣請備麟府未幾羌兵果入寇河外陷豐州乃命涖并賊俄寇麟府繼宣率兵營凌井抵天門關是夕大雨及河師半濟黑凌暴合舟不得進乃具牲酒爲文以禱已而凌解師濟進屯府谷敗賊于三松嶺築甯遠砦相視地脈鑿石出泉又城五砦遷眉州防禦使卒

滕甫字元發以字行知太原府河東兵勞民貧而土豪將吏皆利于有警故喜作邊事民不堪命甫始至蕃族來賀令曰謹斥候無開邊隙有寇而失備與無寇而生事者皆斬自軍司馬沿邊安撫以下皆勒以軍法西人獵境上河外諸將請益兵甫曰寇來則死之吾不出一兵也河東十二將其四以備北其八以備西八將更休爲上下番是歲八月邊郡稱有警請入將皆上謂之防秋甫曰賊若并兵犯我雖八將不敵也若其不來四將足矣卒遣更休而將吏懼甚扣閤爭之甫指其頰曰吾已捨此矣頸可斷兵不可出卒無寇省芻粟十萬河東之所患者鹽與和糴也甫稍更其法明著稅額而通鹽商配率糧草視物力高下而不以占田多少爲差民以爲便陽曲縣舊治城西汾決徙城中縣廢爲荒田甫奏還之

使縣堤防如黃河民復成市諸將駐列城者長吏或不悅招
誣以事有至死者甫奏立法將有罪徙他郡訊驗諸將聞之
喜曰公保吾生當報以死西夏請復故地詔賜以四寨而葭
蘆隸河東甫曰取城易棄城難昔棄囉瓦西人襲我不備喪
金帛不貲且爲所笑乃命部將柴虎蕭士元以兵護還號令
嚴整寇不敢近無一瓦之失將賜寨甫請先畫界而後棄不
從西人已得地則請凡畫界以綏德城爲法從之甫曰若法
綏德以二十里爲界則吳堡去葭蘆百二十里爲失百里矣
兵家以進退尺寸爲強弱今一舉而失百里不可力爭之已
而謀者得西人之謀曰吾將出勁兵于義吳二寨之間劫漢
使不得出兵則二寨亦棄矣甫遂復中前議章九上至數萬
言議者謂近世名將無及甫者甫爲文與詩英發妙麗每出

一篇學者爭誦之篤于行義事父母撫諸弟以孝友聞臨大事決大議毅然不計死生至於已私則小心莊栗惟恐有過其事上及與人交馭將吏待妻子奴婢一以至誠仕至大理評事右光祿大夫龍圖閣學士上柱國南陽郡開國侯有文集二十卷

梁適字仲賢東平人顥子進文授官更舉進士累擢樞密副使遷參知政事進同平章事罷爲觀文殿大學士夏人盜耕屈野河西田累年朝廷欲正封以適爲定國軍節度使知并州至則悉復侵地六百里進太傅卒謚莊

王安禮字和甫臨川人安石弟早登科從河東唐介辟熙甯中郎延路城囉兀河東發民四萬負餉宣撫使韓絳檄使佐役帥呂公弼將從之安禮爭曰民兵不習武事今敵之深入

此不爲寇所乘財凍餓而死耳宜亟罷遣公弼用其言民得歸而他路遇敵者皆覆公弼執安禮手言曰四萬之衆豈偶然哉果有陰德相與共之絳上最多失實公弼以狀聞詔卽河東議功公弼將受之安禮曰宣撫使以宰相節制諸道且許便宜封授一有不韙人猶得非之公藩臣乃欲踰進功狀干非其任耶公弼遂辭遂薦安禮於朝授著作佐郎元豐四年累拜尙書右丞轉左丞尋出紹聖三年知太原府苦風痺臥帳中決事下不敢欺

陶節夫字子禮饒州鄱陽人第進士徽宗時以樞密直學士領經制環慶涇原河東邊事又以龍圖閣學士知太原府羣盜李勉起遼州北平之間河東河北騷動兩路帥臣憲臣皆罪去至出臺郎督捕之節夫請悉罷所遣兵卒以計獲勉坐

上疏乞留本道兵勿移戍降待制卒

范純粹字德孺仲淹子用蔭入官徽宗初復寶文閣待制知太原府後入黨禁復徽猷閣待制卒純粹沈毅有幹畧才應時須厯任胥以治辦聞

曾肇字子開建昌南豐人鞏弟第進士建中靖國中以龍圖閣學士知太原府崇甯中蔡京得政落職卒肇更十一州類多善政云

師範丹徒人崇甯初知岢嵐軍時太原等十一郡地震弼旬晝夜不止壞城壁屋宇人畜死者甚衆範上言請復正臣鑒稷去蔡卞邢恕呂嘉問安惇蹇序辰奸佞以回天變蔡卞觀其奏大怒裂牘不使上進傳假旨配嶺南去之時嵐人遮哭於道車馬不得行

劉适武經郎政和三年知岢嵐軍政尙簡樸連理杏十餘株
生廳舍時以爲德政所感

龔父咸平二年任榆次令營建廟學雅重士流

張伯玉仁宗時爲太谷令愛民勤政廣興水利邑民賴之尤
以文章著名

司馬旦解州夏縣人池子以父任厯知祁縣天大旱人乏食
羣盜剽劫富家巨室至以兵自衛旦召富者開以禍福於是
爭出粟減直以糶猶不失其贏饑者獲濟盜患亦弭畢監在
京百萬倉時祁隸太原以太原留不召仕至大中大夫卒
范純禮純仁弟知太原初禁宰牛未得令會有牛死者純禮
以數百錢買瘞之宰牛者愧而自止每給糧官吏及軍士皆
出一廩雖有涇惡衆無怨言

郭永大名府元城人少剛明勇決身長七尺鬚髯若神以祖
任入官知太谷縣太原帥率用重臣每宴饗費千金取隸縣
以給斂諸太谷者尤亟永以書抵幕府曰非十一而取皆民
膏血也以資觴豆之費可乎脫不獲命令有投効而歸耳府
不敢迫縣有潭出雲歲旱巫乘此譁民永杖巫暴日中雨立
至縣人刻石紀其異府遣卒數輩號警盜刺諸縣短長遊蠹
不歸莫敢迕永械致之府府爲并他縣追還部使者及郡文
移有不便於民必條利病反復或遂寢而不行人謂永毋賈
禍永曰知行吾志而已違恤其它太谷人安其政以爲自有
令無永比者旣去數年復過之則老稚遮留如永始去靖康
末提點河東刑獄建炎初宗澤檄犄角大名遂殉城謚勇節
桑安世紹聖初知榆次縣事勸課農桑教民務本嘗引澗河

水曲折數十里溉田惠利不竭

唐恪字欽叟杭州錢塘人以蔭登第知榆次縣豪子雄於鄉
萃逋庇姦不輸公賦前後莫敢詰恪以理善曉之悟而自改
折節爲長者最聞擢提舉河東常平靖康元年同知樞密院
事爲中書侍郎八月晉拜少宰罷後以議張邦昌仰藥卒
盛子思崇甯間知榆次兼兵馬監押教閱保甲持身廉慎文
行政事皆可師法民口碑嘖嘖不置祀名宦

李諒宣和初知榆次兼管兵馬司公事性平恕富經術政尙

寬簡人以良牧稱之祀名宦

以上太原府

趙贊字元輔幽州薊人延壽子七歲誦書二十七卷賜童子
及第後遷署河中節度延壽北歸贊得留鎮河中漢祖加檢
校太尉仍鎮河中宋乾德六年爲建雄軍節度秋爲汾州路

部署開寶二年又爲河東道行營前軍馬步軍都虞候車駕薄城下分軍四面贊扼其西偏井人乘勝自突門潛犯贊壘贊率衆擊之久而方退努矢貫足太祖勞問數四賜良藥傅之四年改鄜州太宗封衛國公卒贈侍中贊接士大夫以禮馭下有方畧吏民畏服亦賢帥也

臺司已刪誤
列此附訂

張去華字信臣開封襄邑人第進士從太祖征太原以起居舍人監隨駕左藏庫後以將作少監知晉州景德中以工部侍郎致仕卒去華嘗獻元元論大旨以養民務穡爲急真宗命以縑素寫其論爲十八軸列置龍圖閣之四壁云

李垂字舜工聊城人咸平進士修起居注不謁丁謂出累遷知晉州又知絳州明道中召還祇候李康伯言宜謁宰相垂曰我若昔謁丁崖州則乾興初已爲翰林學士矣今已老大

見大臣不公常欲面折之焉能趨炎附熱看人眉睫以冀推輓乎道之不行命也復出知均州卒

尹洙字師魯河南人第進士調正平縣主簿慶厯中以右司諫知渭州兼領涇原路經畧公事再徙知晉州遷起居舍人直龍圖閣知潞州會董士廉訟洙詔遣御史劉湜就鞠不得他罪而以假公使錢貸才將孫用湜誣洙自貸坐貶崇信軍節度副使卒洙於西事尤練習爲慶厯名臣所至胥有治績而不克盡其用云

司馬池字和中夏縣人第進士涖政質易不爲剽割以天章閣待制知河中府再徙知晉州卒

李及之字公達濮州人迪弟子也由蔭登第仁宗時知晉州吏事精明所至稱職致仕卒

孫甫字之翰許州陽翟人初舉進士得同學究出身再舉進士及第李紘薦其材遷大理寺丞知絳州翼城縣杜衍辟之後又以直史館知晉州終於侍讀

呂誨字獻可開封人端孫舉進士治平中爲侍御史知雜事以濮議出神宗初徙知晉州加集賢殿修撰知河中府召入累遷御史中丞首論王安石司馬光嘗勸止之後深服其先見明年誨疾光往省之至則目已瞑聞光哭聲慟然而起張目強視曰天下事尙可爲君實勉之光曰更有以見屬乎曰無有遂卒海內痛惜之

陳希古天禧間由進士以祕書著作郎知翼城縣有文學多所振刷百度修舉邑之風俗一變

陳子履由進士以校書郎知翼城縣歐陽修爲序送之政有

仁聲

劉舒皇祐三年任鄉甯縣初縣治附河數遭水患舒改遷鄂侯故壘自是民有甯宇

庖周卿大名人嘉祐中爲襄陵令終日無少怠未半歲爭訟衰息政恬俗熙每有施設民追思之

孫民先嘉祐初知曲沃縣事勤慎愛民作興學校祀名宦向淙以通直郎知翼城縣疎豁明敏政簡刑清興滯補弊紀律森然吏民畏愛之嘗開東園雖有樂事而闔境謐如稱良吏

劉恕字道源筠州人渙子少穎悟書過目卽成誦舉進士講經義擢第一而廷試不中格更試講經復第一遂賜第爲和川令發強擿伏一時能吏自以爲不及恕爲人重意義急然

諸郡守得罪被劾屬吏皆連坐恕獨恤其妻子如已骨肉又面數轉運使深文峻詆司馬光編修資治通鑑英宗命擇館閣英才共修之光對曰專精史學臣得而知者惟劉恕耳即召爲局僚遇史事紛錯難治者輒以諉之恕卒後七年通鑑成追錄其勞官其子

李察以朝奉郎知翼城縣政平訟簡不喜鉤鉅時訪民間疾苦惻然軫恤建有阜民廳民皆頌之

李清臣字邦直魏人舉進士爲和川令歲滿薦者踰十數應得京官適舉將薛尙有公事未竟闕銓格判銓張揆摛使自陳勿用清臣曰人以家保已而已捨之薄矣願待之揆離席曰君能如是未可量也應材識兼茂科入等元豐六年拜尙書右丞哲宗初轉左丞出外元祐九年復拜中書侍郎徽宗

初再拜門下侍郎爲會布所陷出外卒清臣起身窮約以儉自持居官奉法毋敢撓以私云

李周宇純之馮翊人第進士爲洪洞令民有世絕而官錄其產者其族晚得遺券周取以還之郡吏咎周周曰利民所以利國也縣南有澗支流溢入歲賦菑穰調徙邊之周始築新堤民不告病元祐中以集賢院學士知河中府卒

以上平陽府

楊承信字守真其先沙陀部人光遠子累官節度使檢校太師同平章事宋初加兼侍中征李筠命爲澤州西面都部署移鎮河中刻厲爲政而不苛乾德元年封趙國公二年卒蒲民表乞祠祀

柴成務字寶臣曹州濟陰人乾德中京府拔解太宗爲尹首薦之遂中進士甲科淳化中以左諫議大夫知河中府時銀

夏未甯蒲津當餽輓之衝事皆辦集得脫戶八百家以附籍
府城街陌頗隘狹成務曰國家承平日久如車駕臨幸何以
駐千乘萬騎耶乃奏撤民廬廣之其後真宗祀汾陰果留蹕
河中衢路寬闊顯敞咸以爲便咸平初遷給事中卒

周起字萬卿淄州鄒平人第進士累官樞密直學士祀汾陰
留權知河中府三遷右諫議大夫知并州召拜同知樞密院
事改副使坐善寇準降秩卒謚安惠起性剛介不畏權要故
所至有烈而敷奏協宜措施得體朝政實攸賴焉數賜書褒

諭

孫僅字鄰幾蔡州汝陽人少與兄何俱有名咸平進士甲科
兄弟連冠貢籍時人榮之制科策復入第四等累官權知開
封府授左諫議大夫知河中府晉給事中卒僅諳民政而爲

治以寬云

李虛已字公受建安人第進士累官以能任職稱真宗嘗稱其儒雅循謹特遷右諫議大夫數月出知河中府召權御史中丞以工部侍郎分司卒

趙湘字巨源華州人進士甲科真宗祀汾陰爲考制度副使請如周官置士訓錄所過州縣山川與風俗好惡日上奏御從之後又以直昭文館知河中府終集賢院學士

王濟字巨川饒陽人試學士院累官有聲景德初以監察御史知河中府遼南侵上幸澶淵詔緣河斷橋梁毀船舫稽緩者論以軍法濟曰陝西有關防隔閼舳舻遠屬軍儲數萬一旦沈之可惜又搖動民心因密奏寢其事上深嘉歎遣使褒諭召拜侍御史知雜事

趙及字希之幽州良鄉人父德遠蔚州靈邱令歸宋家偃師及第進士爲慈州軍事推官仁宗時以直昭文館知河中府特拜天章閣待制右司郎中後司留臺卒及所治有聲民吏愛之

吳育字春卿建安人試禮部第一中甲科慶曆五年拜樞密副使尋改參知政事復改樞密副使未幾出累除宣徽南院使經畧鄜延夏人侵耕龐籍守并州欲築堡備之育謂要契未明而亟城麟府必受患移文河東又疏於朝不報旣而郭思昭太原將佐皆得罪去育求解宣徽復爲資政殿大學士尙書左丞知河中府徙河南卒謚正肅

朱選天長人仁宗初知河中府忠厚有守上稱爲長者

楊偕坊州中郡人厯知河中府時元昊反劉平石元孫皆戰

沒偕馳告延州曰大兵十萬且至矣其具芻糧儲什器以俟賊聞遂解去夏竦議增土兵偕言不便時賴其言遂至不擾梅摯字公儀成都新繁人第進士爲侍御史言多觸貴戚同知嘉祐二年貢舉以右諫議大夫知河中府卒摯性淳靜不爲矯厲之行政跡如其爲人

趙尙寬字濟之河南人安仁子知平陽縣鄰邑有大囚十數破械夜逸殺居民將犯境尙寬趣尉出捕曰盜謂我不能來方怠惰易敗也宜急往毋使得散漫又遣微巡兵躡其後悉獲之嘉祐中考課第一又徙知河中府神勇卒苦大校貪虐刊匿名書告變尙寬命焚之曰妄言耳衆乃安已而奏黜校分士卒隸他營官至司農卿卒詔賜錢五十萬

蔣堂字希魯常州宜興人第進士仁宗時以天章閣待制發

運江淮前使五年不一載物遺汴京權貴上嘉之就除河東路都轉運使未行知洪州又以樞密直學士知河中府以禮部侍郎致仕卒

狄青西河人初隸御馬直累擢樞密副使出平儂智高復爲樞密副使遷護國軍節度使河中尹還至汴京拜樞密使以同平章事出判陳州卒贈中書令謚武襄

范純仁字堯夫仲淹子第進士熙甯中知河中府元豐中復知河中府諸路閔保甲妨農論諫甚力錄事參軍宋儋年暴死純仁使其子弟視喪小斂口鼻血出純仁疑其非命按得其妾與小吏姦因會置毒鼈肉中純仁問食肉在第幾巡曰豈有旣中毒而尙能終席者乎再訊之而儋年素不食鼈其曰毒鼈肉者蓋妾與吏欲爲變獄張本以避死爾實儋年醉

歸葬於酒而殺之遂正其罪元祐初同知樞密院事三年拜
尙書右僕射兼中書侍郎明年罷踰年加觀文殿大學士知
太原府其境土狹民庶惜地不葬純仁遺僚屬收無主燼骨
別男女異穴葬者三千餘又推之一路葬以數萬計夏人犯
境朝廷欲罪將吏純仁自引咎求貶有詔貶官一等再徙復
召轉右僕射再出外入黨禁卒謚忠宣純仁嘗曰吾平生所
學得之忠恕二字一生用不盡而仲淹嘗謂諸子純仁得其
忠云

孫路字正甫開封人第進士司馬光用其言乃不棄河湟徽
宗時厯知太原河中府卒

狄棐字輔之潭州長沙人第進士以樞密直學士知河中府
有中貴人過郡言將援棐於上前棐答以他語退謂所親曰

吾湘潭一寒士今官侍從可以老而自污耶爲政愷悌不爲表襮死之日家無餘貲

潘夙字伯恭美從孫生於將家能留心邊務神宗時以直昭文館知河中府終光祿卿

游師雄字景叔學於張載第進士熟西事紹聖初爲衛尉少卿上數問以邊防利害條十六事上進曰紹聖安邊策二年求外補知邠州未幾改守河中府時河中久旱入境天卽大雨民歡謠又自中條山下立渠堰引蒼陵谷水注之城中人賴其利三年遷知秦州尋徙陝州卒於官蒲人哭奠者相屬於路

范百祿字子功成都華陽人鎮兒子第進士累任華要多所論列元祐中拜中書侍郎罷爲資政殿學士知河中府卒

宇文昌齡字伯修成都雙流人第進士涖官所至有聲紹聖中知河中府後以戶部侍郎卒詔爲封傳護送官給其葬費晁補之字無咎濟州鉅野人宗慤曾孫舉進士試開封及禮部別院皆第一徽宗初以國史編修實錄檢討官爲諫官管師仁所誣奏出知河中府修河橋以便民民畫祠其像後號歸來子卒補之蘇門四學士之一也

趙瞻字大觀鰲厓人仁宗時知萬泉捐圭田修學宮士自遠而至改知夏縣作八監堂書古賢令長治跡以自鑒移知永昌縣治平中以濮議由侍御史出通判汾州元祐三年擢僉書樞密院事四年同知院事卒謚懿簡

楚建中字正叔洛陽人第進士知榮河縣民苦鹽稅不平建中約田多寡以爲輕重元祐中文彥博薦爲戶部侍郎不拜

卒

王闢之臨淄人爲河東縣令更治庸敏常慕夷齊高節乃毀淫祠作新廟祠之

韓宗厚字敦夫潁昌長社人贈太師億之孫也父緯嘗知解州宗厚由蔭歷節度判官遷慶成軍使兼知榮河縣卒於官性通敏好學長於吏治雖案牘叢委一視察其隱微更不敢欺以氣節自任嘗受學於王安石及安石輔政屢欲擢用宗厚輒齟齬不諧而罷有文集百卷

以上蒲州府舊志有蒲壽晟咸清間知蒲州嘗建

會井時當南宋地亦非晉

王祐字景叔大名莘人杜重威辟鄴支使勸無背漢坐是貶沁州司戶參軍宋乾德中太祖征太原已濟河諸州饋集上黨城中車乘塞路上聞之將以稽留罪轉運使趙普曰六師

方至而轉運使以罪獲聞敵必謂儲侍不充有以窺我兵俾能治劇者往涖其州卽命祐知潞州及至饋餉無乏路亦無壅尋班師召還太平興國中知河中府

韓國華字光弼相州安陽人太平興國二年進士至道中知潞州轉運使言其善綏輯供億幹辦詔獎之終右諫議大夫子琦

柴禹錫大名人太宗時以胥邸舊僚至樞密副使累知潞州勤於政事善撫綏州民乞留三載詔獎之後復知樞密院事卒贈太尉

吳元扆太原人景德中知潞州初并代澤潞皆分轄戍卒後并于太原至是以元扆臨鎮遂分領澤潞晉絳磁隰威勝七州軍事委元扆專總之元扆在藩鎮有憂民心待賓佐以禮

後卒謚忠惠

畢士安代州雲中人乾德進士咸平中爲翰林學士以目疾求解改兵部侍郎出知潞州以廉介聞特加月給之數入爲翰林侍讀學士景德初與寇準同拜平章事卒謚文簡

馬知節幽州薊人全義子景德中累官宣徽北院使加兼樞密副使不爲王欽若下大中祥符七年出爲潁州防禦使知潞州天禧初移天雄召拜南院使知樞密院事以疾出知貝州上黨大名之民爭來迎謁卒謚正惠

李允則字垂範謙溥子太平興國末以佐班殿直使河東決繫囚原治逋欠天禧二年以客省使知潞州天聖中卒允則洞知人情訟至立斷盜發輒獲守雄州人俱號爲名將云

王曙字晦叔河津人第進士真宗末以給事中知潞州州有

殺人者獄已具曙獨疑之旣而提點刑獄杜衍至事果辨曙作辨獄記以戒官吏尋徙河南府累官參知政事罷復召爲樞密使卒謚文康

范諷字補之齊州人正辭子獻文召試入等復第進士權御史中丞三司使激昂名聲嘗建議朝廷當差擇能臣留以代大臣之不稱職者大臣多惡之諷龐籍彈奏呂夷簡特貶外累知潞州入見上言元昊不可擊獨以兵守要害久當自服上亦稔知其治狀復給事中卒于官

郭諮字仲謀趙州平棘人聰敏過人第進士精干步方田法慶厯中知忻州開渭渠導汾水興水利置屯田轉運使任頗言諮有巧思自爲兵械皆可用詔以所作刻漏圓盾獨轆弩生皮甲來上上嘉之又知汾州未上尋徙潞州作鹿角車陷

馬格請屬獨轅弩于他道詔詒置弩千分給并潞召還提舉
百司卒

歐陽棐字叔弼修子舉進士乙科以職方員外郎知襄州有
美政忤曾布婦兄魏泰泰譖于布徙知潞州旋罷去後以直
祕閣坐元符籍卒

呂陶成都人以集賢院學士論章惇等奸狀出知潞州浹政
與俗相安民甚宜之

朱光庭字公掞河南偃師人父景蔭擢第從孫明復學春秋
又受學于安定二程元祐中仕至給事中知潞州加集賢院
學士鄰境旱饑流民入境者踵接光庭日爲食以食之常至
暮自不暇食遂感疾猶自力視事出禱雨拜不能興再宿而
卒

梁燾字況之鄆州須城人第進士元祐中坐論御史張舜民不宜斥出爲集賢殿修撰知潞州值歲饑不待命發常平粟賑之流人聞之來者不絕燾處之有條人不告病明年以左諫議大夫召甫就道攀轅不得行踰太行抵河內乃已七年拜尙書右丞轉左丞以疾罷坐司馬光黨貶卒

劉安世崇甯初知潞州時部使者以蔡京命治郡中事無巨細皆加詳考卒無毫髮可指雖過往驛券亦無違法部使者深嘆服之

韓昭許昌人宣和中知隆德府有善政民立生祠祀之

孫祀德字延仲濰州北海人第進士以大理寺丞知榆次縣上書言刑法輕重後以右諫議大夫知河中府厯知潞州除吏部侍郎致仕卒

李防字智周大名內黃人第進士以著作佐郎通判潞州後以給事中知潞州卒防精力過人好建明利害

張確字子固邠州宜祿人元祐中進士知汾州宣和七年徙解州又徙隆德府金圍太原忻代降平陽兵叛確表言河東天下根本安危所係無河東豈特秦不可守汴亦不可都矣敵旣得叛卒勢必南下潞城百年不修築將兵又皆戍邊臣生長西州頗諳武事若得秦兵十萬人猶足以抗敵不然惟有一死報國耳書累上不報明年二月金兵至知城中無備諭使降確乘城拒守或獻謀欲自城東潰圍出且探確意確怒叱曰確守土臣當以死報國頭可斷腰不可屈乃戰而死欽宗優贈述古殿直學士召見其子宥慰撫之曰卿父今之巡遠也得死所矣歛容嘆息者久之

劉絢治平間爲長子令不鞭扑而賦自集會大旱府遣吏問災傷絢據實上之及報蠲僅十之二絢封還其檄請盡蠲富鄭公聞之曰眞縣令也

張泛太平興國間爲黎城令持身廉介敷政以誠淑人以禮有古循吏風

谷大同濟陰人紹聖中爲潞城令府志載名宦

孫渤崇甯間任黎城縣才器超逸愛民禮賢六事畢舉以上府志

張克戩字德祥開封人耆曾孫第進士宣和七年知汾州十二月金圍太原遣銀木孛堇來攻克戩畢力扞禦出不意焚其柵敵引去加直祕閣靖康元年六月金兵復逼城宣撫使綱表其守城勞連進直龍圖閣右文殿修撰太原不守張思

正張灝李宗奔慈隰麻世堅夜斬關出通判韓琬相繼亡克
戢召令兵民曰太原旣陷吾固知亡矣然義不忍負國宗辱
父祖願與此城終始以明吾節諸君其自爲謀皆泣不能仰
視同辭對曰公父母也願盡死聽命乃益厲兵倣守而援師
訖不至平遙破介休孝義諸縣降金兩遣使持書諭克戢焚
不啟且述危苦狀募士問道言之朝不報十月朔有十人唱
爲降語斬以徇度不得免手草遺表及與妻子遺書絕州兵
持抵汴明日金兵入猶帥衆巷戰金人募生致之克戢歸索
朝服焚香南向拜舞自引決一家死者八人金將禮葬於後
園爲立廟事聞詔贈延康殿學士賜銀三百兩絹五百匹表
揭門閭紹興中謚忠確與克戢同時巷戰死者有汾州兵馬
都監賈亶事別見

案是年後汾州入金無復兵事舊志名宦
列陳寅西河守與妻杜氏死難考陳寅乃

理宗初定初知西和州守城死上距靖康初汾州西河入金
凡百有三年和字史文不誤改而入此且加以西河守之稱
失檢甚矣府志已駁之

杜衍知平遙縣謹密清整決訟明允

王益柔字勝之曙子伉直喜論事用蔭入官杜衍丁度宣撫
河東寓書言河外兵饑無法非易帥臣轉運使不可因條其
可任者衍度使還以學術政事薦知介休縣范仲淹未識而
以館閣薦之除集賢校理仕至知制誥兼直學士院

田晝字承君陽翟人以從父況任入官知西河縣有善政民

甚德之

以上汾州府

裴德裕聞喜人雍熙間澤州知州清廉不擾官至少府監勲
開國侯

吳中復字仲庶興國永興人第進士厯臺諫有直聲以天章

閣待制知澤州又爲河東都轉運使熙甯中卒

李昭遘字逢吉深州饒陽人宗諤從子楊億嘗薦之仁宗時知澤州陽城冶鑄鐵錢民冒山險輸礦炭苦其役爲奏罷鑄錢又言河東鐵錢真偽淆雜不可不革仕至天章閣待制卒

呂大忠藍田人嘉祐中任晉城令剛毅質直爲治有聲

李景章崇甯中知澤州才識卓越善政宜人民咸德之

楊咸弼開寶間爲高平令性嚴能決斷每抑挫豪右申理屈滯愛民勸課開墾屯田公私便之

楊仲元字舜明管城人第進士仁宗時知澤州沁水縣民持物來輸者視其價稍增之餘則下其估官有所需不强賦民聽以所有與官爲入度相當則止率常先辦河外用兵督餉轉西界夕宿洪谷口仲元相其地乃寇所由徑路亟命去之

民以困乏爲辭不聽寇果夜出劫諸部沁水獨免後二十年其子過縣父老拜泣曰河西之役非公無今日矣初軍期尙緩而仲元督行甚急至則芻糧有不集者皆可賤市後期者物價數倍民始知其利州買羊斂民差出錢帛滋蔓病民爲甚更其令戶纔費錢百又遣吏市羔於他所明年以供州不科民一錢仕至中散大夫卒仲元嘗戒諸子曰吾入官五十年未嘗以私怒加人雖杖刑之微苟有兩比不敢與輕法以是爲報國爾

義甫慶厯間爲高平令進階中散大夫性勤慎法令嚴明調停振恤民免勞費而僉民徭尤多所裁省

程顥字伯淳世居中山後從開封徙河南舉進士爲晉城令富人張氏父死旦有老叟踵門曰我汝父也子驚疑莫測相

與詣縣叟曰身爲醫遠出治疾而妻生子貧不能養以與張
顥質其驗取懷中一書進其所記曰某年月日抱兒與張三
翁家顥問張是時纔四十安得有翁稱叟駭謝民稅粟多移
近邊載往則道遠就糴則價高顥擇富而可任者預使貯粟
以待費大省民以事至縣者必告以孝弟忠信入所以事其
父兄出所以事其長上度鄉村遠近爲伍保使之力役相助
患難相卹而姦僞無所容凡孤茆殘廢者責之親戚鄉黨使
無失所行旅出於其塗者疾病皆有所養鄉必有校暇時親
至召父老與之語兒童所讀書親爲正句讀教者不善則爲
易置擇子弟之秀者聚而教之鄉民爲社會爲立科條旌別
善惡使有勸有恥在縣三歲民愛之如父母熙甯初呂公著
薦爲監察御史裏行哲宗初召爲宗正丞卒文彥博題其墓

曰明道先生嘉定十三年賜謚曰純公淳祐元年封河南伯
從祀學宮

張之才字次文遼人紹聖初爲陽城令清謹愛民名聞當世
去官日辭湯廟詩云一官來此四經春不負蒼天不愧民神
道有靈應信我去時猶似到時貧邑人溫光刻石頌之

董沔任陵川令忠於謀國切於愛民有學識抗疏罷毀淫祀
呂由庚任陵川令能興教化士風丕變提刑學士黃公廉以
詩寵之祀名宦

以上澤
州府

孫益宣和末以福州觀察使知朔甯府命救太原時敵勢張
甚或言不若北擣雲中彼將士室家在焉所謂攻其所必救
也益曰此策固善無違君命因躍馬冒圍至城下張孝純不
肯啟門遂死之益天資忠勇傾貲以賞戰士能得人死力云

平府

馬仁瑀大名夏津人從周世宗征高平師不利仁瑀控弦躍馬挺身出陣遂敗之世宗至上黨諸將坐失律誅者七十餘人擢仁瑀爲弓箭直控鶴指揮使宋初從征澤潞又以功領常州防禦使開寶四年遷瀛州防禦使威名尤著太平興國初移知遼州四年征太原命分兵攻城遷朔州觀察使判瀛州事七年卒贈節度

安守忠字信臣陽曲人開寶五年知遼州民有陰召并寇謀內應者事泄悉斬以徇九年征太原與孫晏宣由遼州入旣而與路羅砦監押馬繼恩會兵入賊境燔砦四十餘獲牛羊數千太平興國初移知靈州守忠謹愨淡泊爲治簡靜所至藩郡樂施子豐宴犒故時論與之太祖征太原多與謀議而

人罕知云

臧丙字夢壽大名人太平興國初進士平晉陽以丙爲石贊善大夫知遼州丙素剛果有吏幹會同年生馮汝士知石州與監軍不協一夕剗刃於腹而死丙上言汝士死非自殺乞按治上遣鞠之召丙問狀丙曰汝士居牧守之任不聞有私罪若冤死不明不加宿直者以罪今後書生不能治邊郡矣上嘉其直改著作郎後充河東轉運使兼本路營田使終有諫議大夫

劉渙以諫官劾劉太后左遷興遼州治行卓異

李宏知遼州宣撫使韓絳築囉兀砦調三十萬夫遼州最窮僻上戶猶配夫四百三十四僦直計三千緡下者十六人直十萬輦運經二十二驛民多破產上下莫敢言宏能約民力

所勝而餽不失期以訴其實令鞠罪御史裏行范育使河東請貸被劾官吏從之

以上遼州

解暉洺州臨洺人隸兵籍戍雁門與遼人接戰斬七級獲首一人以功遷奉國軍隊長周廣順初從王峻援晉州率敢死士三千餘夜入遼師帳擊之殺獲甚眾宋初從征澤州力戰目中流矢師還策勲爲內外馬步軍副都軍頭右第二軍都指揮使乾德六年詔領部軍屯上黨從李繼勲署太原開寶九年破太原軍於境上斬千餘級獲馬三十四匹太平興國二年詔於潞州北亂柳石園中築城置威勝軍以暉爲軍使從征并州先下隆州賜予有加復令與石彥贊督戰士隸城西行營劉繼元降以太原宮女三人賜之俄以功遷本州團練使雍熙初充雲應寰朔忻代等州都巡檢使三年代歸終右

千牛衛大將軍暉頻立戰功金創徧體時稱驍將

曹光實雅州百丈人太平興國四年征河東知威勝軍事令調軍食光實願提一旅奮銳先登上曰資糧事重亦足宣力也河東平命爲汾遼石沁都巡檢使五年興潘美分道出雁門爲前鋒遇敵迎擊敗之斬數千級優詔褒獎後爲李繼遷誘害贈賻加等沁州以上

程琳字天球大中祥符間知并州壽陽縣性方重寡言笑凡所處畫簡嚴明敏邑大治後累階至開府儀同三司勲上柱國爵廣平郡公食邑七千四百戶卒贈中書令謚文簡

呂陶字元鈞成都人第進士知壽陽縣帥唐介辟僉書判官暇日促膝晤語告以立朝事君大節曰君廊廟人也薦應熙甯制科論新法不便入等元祐時仕至給事中紹聖時以集

貢院學士知潞州後致仕卒

張元淳字不淪元祐初任壽陽縣下令必信遇民以誠不數月人服其化庭無留訟邑故孔子廟近市湫隘歲久圯陋元淳卜地改建爲屋四十楹規制大備復延邑有學行者處師位而首遺其子入學與諸生齒由是邑之人始奮然思向學焉

孟天常字子履河南人元祐末任壽陽令以能治劇稱興滯舉廢多所建置潞州司戶參軍張山爲之記

以上平定州

賀惟忠定襄人性剛果知書曉兵法初仕周知易州宋興授本州刺史兼易定祁等州都巡檢捍禦有功撫士卒得其死力戰無不克名震北邊十餘年契丹不敢南牧

張永趙郡人知忻州州產鹽轉運使欲以盜賊罪罪兵吏永

上言惡鹽累防兵非計詔弛其禁民甚德之餘政多類此

劉景文知忻州剛正公嚴恩洽民庶

忻州以上

陳恕河北營田使改刺代州築城壘修戰具太祖知恕有心計詔爲鹽鐵使

張齊賢曹州宛句人太祖幸西都嘗條陳十事首曰下并汾太平興國二年第進士四年代還會親征晉陽上謁忻州新下命知州事明年召還雍熙三年代州楊業戰沒齊賢請行授給事中知代州與部署潘美同領緣邊兵馬時遼兵自胡谷入齊賢誓眾慷慨一以當百遼兵遂卻先是約潘美以并師來會戰間使爲遼人所得既而美使至云密詔不許出戰齊賢夜發兵二百人持一幟負一束芻距州城西南三十里列幟燃芻遼兵以爲并師至駭北走齊賢先伏步兵二千於

土磴砦掩擊大敗之捷奏且歸功漢贊端拱元年冬拜工部侍郎遼人又自大石路南侵齊賢簡府兵千人爲二部分屯繁峙崞縣果爲繁峙兵所敗二年置屯田領河東制置方田都部署入拜樞密副使淳化二年拜參知政事同平章事真宗初再拜同平章事以司空致仕卒謚文定

譚延美大名朝城人雍熙三年與田重進出飛狐北曰彼恃眾易我宜出其不意先攻之卽麾騎軍直進遂獲大鵬翼端拱二年授邕州觀察使判亳州兼知代州是時任邊郡者皆領內地一州處其家屬從知潞州咸平中卒贈建武軍節度柳開字仲塗大名人幼穎異有膽勇旣就學喜討論經義所交皆一時豪雋開寶六年進士厯知貝州及曹邢二州真宗卽位命知代州上書言邊事及時政得失開至州葺城壘戰

具諸將多沮議不協開謂其從子曰吾觀昴宿有光雲多從北來犯境上寇將至矣吾聞師克在和今諸將怨我一旦寇至必危矣即求換郡徙忻州刺史及契丹犯邊上書請車駕觀兵河朔四年徙滄州道病卒有集十五卷

劉文質字士彬保州保塞人太宗時以西京左藏庫副使爲岢嵐軍使賜金帶名馬祥符中爲石隰緣邊同都巡檢使天禧中知代州先是番部獲逃卒給絹二匹茶五斤卒皆論死時捕得百三十九人文質取二十九人以赦後論如法餘悉配隸他州再知代州卒

劉永年字君錫太原人美孫仁宗時知代州寧人取西山木積十餘里輦載相屬於路前守不敢過永年遣人焚之一夕盡事聞上稱善遽移檄捕縱火盜永年曰盜固有罪然發在

我境何預汝事乃不敢復言上嘗問禦戎策對合旨書忠孝字以賜英宗時復知代州厯太原副都總管卒謚莊恪

劉舜卿字希元開封人神宗時知代州加客省副使遼遣謀盜西關鎖舜卿密易舊鑄而大之數日遼以鎖來歸舜卿曰吾未嘗亡鎖也引視納之不能受慚去誅謀者仕至步軍副都指揮使卒謚毅敏舜卿知書曉吏事謹文法善料敵著名北州

周永清字肅之靈州人以蔭入仕熙甯中知代州遼求地命韓縝分畫永清試焉入對言疆境不可輕與人臣職守土不願行固遣之復上章陳利害竟以母病辭終東上閣門

呂大忠字進伯京兆藍田人第進士爲晉城令熙甯中令與劉忱使遼議代北地會父喪起知代州遼使蕭素梁穎至代

設次據主席大忠與之爭乃移次長城北換西上閤門使知石州大忠數與素穎會屢以理折之素穎稍屈已而復使蕭禧來求代北地神宗召執政與大忠劉忱議將從其請大忠曰彼遣一使卽與地五百里若使魏王英弼來求關南則何如神宗曰卿是何言也對曰陛下旣以臣言爲不然恐不可啟其漸忱曰大忠之言社稷大計願陛下熟思之議卒不決罷大忠終喪其後竟以分水嶺爲界大忠仕至寶文閣直學士卒

李聳宣和末爲崞縣令金人破城與縣丞王唐臣縣尉劉子英同死之

以上代州

高渙廣陵人熙甯間授朝散大夫知保德軍創建文廟於南

坡

保德州

李建中字得中家洛陽太平興國進士嘗知解州恬于榮利
前後三求掌西京留臺卒建中書札爲宋第一軼出蘇黃米
蔡上自署嚴夫民伯云

王禹偁字元之淳化四年自商洛移刺解州多善政見州堂
壁間石刻上鐫鹽池詩

張杲之符離人元祐間權知解州軍州兼管內勸農事雍和
鎮靜民咸樂之

李士衡成紀人知解州居官廉潔不求名譽

李衡知解州廉靜不爲矯激民安物阜人咸思之

史新至和間以司封官解州有能名重新孺溪亭以樂其母
先是新父亦官解州爲一時盛事

陳師錫字伯備建州建陽人舉進士廷試神宗閱其文屢讀

屢歎曰此必陳師錫也啟封果然擢第三元祐中以祕閣校理知解州徽宗初爲殿中侍御史首論蔡京蔡卞斥出卒尹源字子漸河南人與弟洙皆以文學知名舉進士知芮城縣有政聲後知懷州卒

張戢長安人橫渠弟由進士累調知靈寶縣熙甯初爲御史裏行累章論王安石亂法出知公安縣改夏縣縣素多訟戢反復教諭不數月而訟衰靈寶之民遮使者車請曰今夏令張君乃吾昔日之賢令也願乞張君還舊治使者爲言於朝去之曰遮道送無不泣下者後徙監司竹監卒于官祀名宦邵伯溫字子文洛陽人雍子父友司馬光等屈名位輩行與爲再世交光入相嘗欲薦伯溫未果而薨後爲潞州長子縣尉光子康詣闕邢恕召康詣河陽伯溫謂康曰公休除喪未

見君不宜枉道先見朋友康曰已諾之伯溫曰恕傾巧或以
事要公休若從之必爲異日之悔康竟往恕果勸康作書稱
蔡確以爲他日全身保家計康恕同年登科第又出光門下
康遂作書如恕言恕蓋以康爲光子言確有定策功世必見
信旣而梁燾以諫議召恕亦要燾至河陽論確功且以康書
爲證據不悅會吳處厚奏確罪燾與劉安世請誅確且論恕
罪亦命康分析康始悔之康卒子植幼宣仁后憫之呂大防
謂康素以伯溫可託請以伯溫爲西京教授以教植伯溫旣
至官則誨植曰溫公之孫大諫之子賢愚在天下可畏也植
聞之力學不懈卒有立後復知芮城縣仕至都轉運副使卒
趙鼎少從伯溫游及相乞行追錄贈祕閣修撰
張成元祐間知解州爲政平恕吏民多懷思之

麻吉平陸縣令尊禮生儒創建學校

以上解州

宋敏求字次道綬子賜進士及第治平中知制誥判太常寺神宗初坐論宗室服貶秩知絳州然敏求議初不誤宰相曾公亮惡禮院因是去之是歲卽詔遷後加龍圖閣學士卒特贈禮部侍郎敏求藏書三萬卷熟朝廷典故嘗建言河北陝西河東舉子性朴茂而詞藻不工故登第者少請令轉運司擇薦有行藝材武者特官之使人才參用而士有可進之路又州郡有學舍而無學官故士輕去鄉里以求師請置學官後頗施行之

錢惟濟知絳州有強奪民條桑者不能得乃自斫其右臂誣以陷人惟濟引問面給以食盜以左手舉筋因語之曰他人行刀則上重下輕今下重上輕正用左手傷右臂也誣者引

服

謝皓字商老入太學與游權老龔吉老齊名時人目爲三老
元豐中第進士歷金部郎官遼使至命皓代張瓘等接對皓
曰不疑於物物亦誠焉苟待之以誠彼雖無知亦當屈服明
年以太常少卿使遼比還凡北界山川地理名物情狀皆以
聞遷司農少卿出守絳州以公廉稱

慈卿字釋回咸平間聞喜令李垂修學記云田賦平而民定
川原肅而寇絕

安公武威人爲龍門令愛民課士寓撫字於催科正風化於
學校公餘講習舊業證辨新條能以經術飾吏治嘗於廳事
東作醉經菴以寓沈湛經籍之意汝南袁幾刻石以頌其德
政

劉煜字耀卿河南洛陽人溫叟子進士及第知龍門縣羣盜殺人捕得之將械送府恐道亡去皆斬之眾服其果後以龍圖閣直學士知河中府卒煜嘗善河中處士李讀讀卒爲陳其高行詔以著作郎贈之

唐肅字叔元杭州錢塘人七歲能誦五經第進士歷官善辨疑獄嘗知聞喜縣終龍圖閣待制

以上絳州

葛懷敏知隰州有守禦功

劉景文元祐中守隰州治以最稱

以上隰州

孫固管城人進士知霍邑縣時相韓琦知其賢諭使來見固不肯往琦器重之

宗澤字汝霖婺州義烏人第進士調晉州趙城令下車請升縣爲軍書聞不盡如所請澤曰承平時固無慮他日有警當

知吾言矣高宗初除龍圖閣學士言刑部指揮云不得賡攝
赦文於河之東西陝之蒲解是視天下忠義之氣而自絕其
民也臣雖竊怯當躬冒矢石爲諸將先李綱薦知開封府河
東巨寇王善擁眾七十萬車萬乘澤單騎至營招降之又連
結河東山水砦忠義民兵卒贈觀文殿學士謚忠簡

以上
霍州

右宋一百五十一人

耶律學古字乙辛隱于越洼之庶孫好學工詩乾亨二年爲
彰國軍節度使時南境未靜民思休息乃禁寇掠以安之會
宋將潘美率兵分道來侵學古以軍少虛張旗幟雜丁黃爲
疑兵是夜適獨虎峪舉烽火遣人偵視見敵俘掠村野擊之
悉獲所掠物擒其將領自是學古與潘美各守邊約無侵軼
民獲安業以功爲惕隱卒

山西通志卷一百一
名臣金二
右遼一人

蒲機知文水縣開常稔渠有碑記

楊伯元字長卿開封尉氏縣人登大定二年進士第調鄆城主簿進榆次令召爲大理評事官至工部侍郎累遷安武軍節度使以才幹多被委任爲推排定課使及審錄官人稱其平卒謚曰達祀名宦

史純大定間以忠顯校尉爲陽曲縣令撫馴其民嘗禱雨列石祠有應自作記

楊邦基字德懋華陰人好學天眷二年登進士第爲太原交城令太原尹徒單恭貪汙不法託名鑄金佛命屬縣輸金邦基獨不與徒單恭怒召至府將以手持鐵柱杖撞邦基面邦基不動承德廉察官吏尹與九縣令皆免去邦基以廉爲河

東第一召爲禮部主事大定中同知西京留守事致仕卒
烏林答吾干女泰和三年爲榆次令有議幹訟者立辯曲直
無不允服

喬天翼爲合河令元兵陷城不屈死明嘉靖中提學閔以涖
政有功臨難守節請登正祀

李好復中山安喜人爲榆次令安集流通撲滅奸盜後入爲
巡警使嘗縛一犯禁護衛寘於法人憚其嚴

以上太原府

張浩字浩然遼陽渤海人天會八年賜進士及第天眷中爲
平陽尹平陽多盜臨汾男子夜掠人婦浩捕得擄殺之盜遂
衰息近郊有淫祠郡人頗事之廟祝田主爭香火之利累年
不決浩撤其祠投其像水中強宗黠吏屏迹莫敢犯者郡中
大治乃繕葺堯帝祠作擊壤遺風亭後封蜀王拜左丞相太

師卒謚文康配享世宗廟庭

楊伯雄字希雲正定藁城人皇統二年進士大定時爲平陽尹先是張浩治平陽有惠政及伯雄爲尹百姓稱之曰前有張後有楊徙河中府卒謚莊獻伯雄族兄伯淵喜收古書天會十年賜進士第知平定軍用廉遷平州路轉運使致仕卒劉冲誠宛平人知大同府尋改平陽府性剛古果於從善怡民有方爲一時能吏

冲誠金史有傳舊通志大同名宦別作仲誠

李華河津人性穎悟讀書一再誦輒不忘舉進士累官戶吏

二部尙書貞祐中拜參知政事後出知平陽城被圍屢出戰

裨將出降華自殺贈尙書左丞

金史作李革案華官太原歷河東北路轉運勾判嘗開五

臺水利故五臺祀之名宦而史誤河東北路爲河北東路五臺志竟書爲臺州知州舊通志又改臺州爲代州而以李革

李華並列不實一人也

劉徽柔字君美大興安次人天眷二年擢進士第爲開遠軍節度掌書記遷洪洞令明敏善聽斷縣人楊遠者投牒於縣以爲夜雨屋壞壓其姪死號訴哀切徽柔熟視而笑曰汝利姪財而殺之乃誣雨耶叱付獄其人立伏曰公神明也不敢延死遂寘於法秋滿縣人遮戀不得去者彌日爲立生祠刻石頌德大定二年同知河東南路轉運使事以廉第一改知平定軍仕至中都路轉運使卒

丁曄仁字藏用大興府宛平人皇統二年登進士第爲和川令前令罷奕不事事羣小越法干禁無所憚曄仁申明法禁皆屏息或走入他縣以避之有董祐者最强悍畏服曄仁以刀斷指誓終身不復犯法凡租賦與百姓前爲期率比他邑先辦大定中同知西京留守事首興學校以明養士之法卒

官陝西西路轉運使

楊時翼城人大定間爲本縣令篤忠愛戒貪殘教民務本民德之

趙景溫丹陽人泰和間爲襄陵令寬於御眾勇於立義多善政以廉謹著稱

孫九鼎定襄人明經狀元以尙書員外郎知翼城縣事時多盜鼎多方勦捕之梟其渠魁餘黨解散

以上平陽府

李愈絳州正平人正隆間詞賦進士歷武定節度西京留守憲臺廉察皆最改知河中府事

馬伯祿字天錫通州三河人幼志學事繼母孝登大定二年詞賦進士調武清簿歷遷龍水令同知北京路轉運使南京提刑侍御史所至皆以清直能幹聞轉知河中府事卒謚忠

貞

王蔚香河人六定間爲良鄉丞有卓異績超授河東北路鹽運使廉爲諸路最加知河中府

張萬公字良輔東平東阿人幼聰悟喜讀書登正隆二年進士第章宗初爲彰國軍節度使明昌二年拜參知政事六年知河中府時軍興調發叢劇悉爲寬假使民力易辦人爲繪像於薰風樓又建去思堂尋入爲平章政事封壽國公卒謚文貞配享章宗廟庭

蒲察婁室猛安人舉進士知河中府事後死王事贈資德大夫定國軍節度使謚襄勇

完顏宗道本名八十上京司屬司人通周易孟子善騎射知河中府有惠政民立像於層觀以時祀之

牛德昌字彥欽蔚州定安人皇統二年進士爲萬泉令屬蒲
陝薦饑羣盜充斥州縣城門晝閉德昌到官卽日開城門縱
百姓出入勝曰民苦饑寒剝掠鄉聚以偷旦夕之命甚可憐
也豈奸宄比耶能自新者概不問賊皆感激解散縣境以安
府尹王伯龍嘉之禮待甚厚累官太原尹卒贈中奉大夫
晁會高平人爲猗氏令丰饒奇偉器度恢宏善訓誨勤撫字
時分俸以給貧乏陞興平軍節度副使

吳鑄長春人大定三年宰榮河撫民有方蝗不入境旱禱卽
雨民刻石頌之

以上諸
州府

沈璋字之達奉聖州永興人遼時學進士業與李師夔同附
金爲山西路都轉運副使太行賊陷潞州殺其守姚璠官軍
討平之命璋權知州事璋至招復遁逃賑養困餓收其橫尸

葬之未幾民頗安輯初賊黨據城潞軍當緣坐者七百人帥府牒璋盡誅之璋不從帥府聞之大怒召璋訶責且欲殺璋左右震恐璋顏色不動從容對曰招亡撫存璋之職也此輩初無叛心蓋爲賊所脅有不得已者故招之復來今欲殺之是殺降也苟利於眾璋死何憾少頃怒解因召潞軍曰吾始命戮汝今汝使君活爾矣皆感泣而去朝廷聞而嘉之拜左諫議大夫知潞州事百姓爲之立祠移知忻州改同知太原尹加尙書禮部侍郎時介休人張覺聚黨亡命山谷抄掠邑縣招之不肯降曰前嘗有降者皆殺之今以好言誘我是欲殺我耳獨得侍郎沈公一言我乃無疑於是命璋往招之覺卽日降轉尙書吏部侍郎西京副留守同知平陽尹改鎮西軍節度使天德元年致仕卒

蕭仲宣皇統間爲昭義節度使政尙平易然能約束小吏不敢爲奸賄賂禁絕百姓爲立祠

孫德源大定初遷沙河令大定間改昭義軍節度使潞州破被執俄有拜于前者皆沙河舊民密護德源釋之貞祐二年拜工部尙書攝御史中丞

韓俊天會間知襄垣縣盜賊蜂起率眾禦之且戰且城寇漸平又築外城民有所恃

喬辰知襄垣縣嘗著座右銘

賀允中大定中遷承直郎行襄垣縣令勤政愛民廢墜修舉烏塘遼陽人大定間任長子令舊訟牒累干塘至剖決如流革包納侵漁之弊招撫流移復業民立德政碑

以上澤安府

郭企忠字元弼唐汾陽王子儀之後郭氏自子儀至承勳皆

節鎮北方唐季承勳入於遼子孫繼爲天德軍節度使至昌
金降副使企忠襲父官金天輔中軍至雲中遣耶律坦招撫
諸部企忠來歸軍帥命同勾當天德軍節度使事天會三年
領西南諸部蕃漢軍兵爲猛安從破宋雁門屯兵卽鎮代州
明年賊楊麻胡等聚眾數千於五臺討平之遷知汾州事是
時汾州初下居民多爲軍士掠去城邑蕭然企忠詣帥府力
請願聽其親舊贖還帥府從之未幾完實如故石州賊閻先
生眾數萬至城下僚屬慮有內變請爲備企忠曰吾於汾人
有德保無他乃率吏民城守會援至合擊破之六年遷天德
軍節度使後權沁州刺史卒

完顏說出虎興定二年以節度守汾州蒙古木華黎破汾州
出虎力戰死

郭震河間人孟門縣令才能恭勤革除奸弊威以馭吏仁以及民邑人立生祠

劉文通大定年任甯鄉令振興文教均賦寬民

宋德玉泰和年任甯鄉令性聰才捷訟理化行

以上汾州府

左祕劉州人太師企弓之子皇統初爲澤州刺史廢一切鉤距細苛不嚴而治刑獄猥積決遣無留平南山盜革守城繁役秋糧納粟請折以米費省不貲歷政三年清儉自處吏畏民安綽有政聲

李仲略高平人文簡公子幼敏悟善屬對大定間官至都曹以父老乞歸特授澤州刺史蒞政剛介特立不阿權勢值歲歉發倉振濟後自劾以聞上嘉之賜勅獎慰

許安仁字子靜獻州交河人善屬文登大定七年進士第明

昌四年以左補闕諫幸金蓮川疏奏罷幸出爲澤州刺史作
無隱論上之凡十篇皆切中時務在郡二年徙同知河南府
升汾陽軍節度使致仕卒謚文簡安仁賢實無華澹然有古
君子風

楊廷秀華州人官司諫泰和初自獻州刺史移刺澤州政平
訟理民用康乂雅善文辭注程楊易傳行於世自號虎峰居
士升平涼府同知

劉敏行平州人天會三年進士爲高平令縣城圯壞久不修
盜橫恣掠縣鎮不能禦敏行出已俸率僚吏出錢雇役繕治
百姓欣然從之凡用二千人版築遂完鄉村百姓入保賊至
不能犯累遷河北東路轉運使卒

王庭直天眷間知高平縣劇盜蜂起庭直悉力集事修濬城

陞民恃無恐

魏繼隆天會間任陵川令首重學校嘉惠良民

張恪開封人大定間爲陽城令清靜簡易寬而能斷民樂其化爲立去思碑祀名宦

察剋吾歌泰和間以安遠大將軍行高平令仁而能斷和易不苛剋劇撥繁雖纖悉罔有滯者懲奸化暴遠近俱安

田居敬陵川令廉明正直勤撫字樂教誨有瑞麥嘉禾之祥郭質泰和間爲高平令識度深遠操履方潔其學校繕城垣

卹民興教扶善鋤惡民爲立祠

以上
州府

移刺胡刺大定二十六年爲彰國軍節度使應州寺僧與判大宗正事曹王永功有舊將訴事於胡刺求永功手書爲地胡刺得書奏之上謂宰臣曰永功以書囑事胡刺此雖細微

不可不懲凡人小過不懲遂至大咎有犯必懲庶幾能改是亦教也皆曰今用法無私臣下敢不敬畏於是永功解職

大懷貞字子正遼陽人大定中由忻州防禦遷彰國軍節度使縣尉獲盜得一旗上圖亢宿詰之有謀叛狀株連幾萬人懷貞請誅其首亂者十八人餘皆省釋嘗以私忌飯僧數人就中一僧異常懷貞問曰曾爲盜殺人否對曰無之後三日詰盜果引此僧皆服其明察

以上大同府

蕭仲宣遼中書令守司空特末子從天祚至石輦鐸天祚留仲宣侍母遂皆見獲皇統時歷順義昭義軍節度使爲政平易小吏不敢爲姦賄賂禁絕奴婢入郡人莫識其面朔路百姓皆爲立祠刻石頌之正隆二年卒

已見遼安府

完顏永元字惇禮本名元奴代王充子幼聰敏日誦千言大

定中爲順義軍節度使朔州西境多盜而猾吏大姓蠹獄訟
脅亂賦役永元剔其夙姦百姓安之坐賣馬與驛人解職又
起厯昭義絳陽軍節度使後卒永元厯典大藩多知民間利
害所至稱治順義政迹尤著民爲立祠

蒲察鄭留字文叔東京路猛安人大定二十二年進士累官
順義軍節度使西京人李安兄弟爭財府縣不能決按察司
移鄭留平理月餘不問會釋奠孔子廟乃引安兄弟與諸生
敘齒列坐會酒陳說古之友悌數事安兄弟感悟謝曰節使
父母也誓不復爭相讓而歸朔州多盜鄭留禁絕游食及多
蓄兵器因行春撫諭之盜乃衰息獄空賜錫宴錢以褒之貞
祐中致仕卒

以上朔
平府

完顏九住宗室子爲武州刺史唐括李果速爲軍事判官貞

祐二年十一月元兵取九住子姪抵城下謂之曰山東河南
今皆降我汝之家屬我亦得已不速降且殺之九住曰當以
死報國遑恤家爲無何城破力戰而死李果速亦不屈死焉
贈九住臨海軍節度使加驃騎衛上將軍李果速建州刺史
加鎮國上將軍仍令樹碑歲時致祭

甯武府

呂宗禮性穎悟有才辯行業過人天會九年詔郡邑設吏員
鄉里以宗禮謹慤推試吏事擢律科進士第一權遼州事充
河州知法權防禦判官轉文林郎遼州司候判官卒祀名宦
楊伯元開封人初爲榆次令有惠政以憂去起遼州刺史政
績益著

已見太原府重出

馬克禮漢馬援後知和順縣事德惠及民君子謂不忝其先
有德政碑

遼州以上

李完字全道朔州馬邑人經童出身復登詞賦進士第以任
澄城主簿廉遷定襄令世宗嘗選能吏八人按行天下完其
一也後任河間府治中提刑司言完習法律有治劇才升沁
州刺史仍以璽書褒諭承安中卒完長於吏治所至姦惡屏
迹民皆便之

王特起崞縣人進士太和中爲正定錄事參軍有惠政改沁
源令愛民禮士去後人思之崇祀名宦

楊閏襄垣人金末同知沁南節度使銅鞮令城陷死難

以上沁州

趙秉文字周臣磁州滏陽人幼穎悟登大定二十五年進士
第爲同知岢嵐軍州事泰和二年十月爲甯邊州刺史三年
改平定州前政苛於用刑每聞赦將至先拊賊死乃拜赦而
盜愈繁秉文爲政一從寬簡旬月盜悉屏跡歲飢出祿粟倡

豪民以賑全活者甚眾仕至翰林學士卒

智楫大定間知孟縣寬而有制百事具舉越二載夏大旱禱

於藏山引咎自責俄大雨歲乃登

以上平定州

傳慎徽沙溪人宋末進士金天德年忻州刺史淳質篤古有
惠政重修學校

劉煥字德文中山人天德元年進士以監察御史攝戶部員
外郎代州錢監雜青銅鑄錢錢色惡類鐵錢民間盜鑄抵罪
者眾朝廷患之下尙書省議煥奏曰錢寶純用黃銅精冶之
中濡以錫若青銅可鑄歷代何緣不用自代州取二分與四
六分青黃雜揉務省銅而功易就由是民間盜鑄陷罪者眾
非朝廷意也必欲爲天下利宜純用黃銅得數少而利遠其
新錢已流行者宜驗數輪納準換從之遷管州刺史以廉升

鄭州防禦使遷遼東路轉運使卒

周美巴蜀人知管州德政顯著有去思碑記

石琚中山人天眷二年狀元以廉幹由刑臺改令秀容縣額

設勾直十五入市井無賴竄名者甚眾琚至逐去民大悅有

訟者召至諄誨諭使自愧服期月大治

以上忻州

僕散忠義本名烏者上京拔盧古河人宣獻皇后姪元妃之兄也皇統八年爲兵部尙書海陵篡立出爲震武軍節度使火山賊李鐵槍乘暑來攻忠義單衣從一騎迎擊之射殺數人賊乃退改臨洮尹世宗立拜平章政事封榮國公大定六年卒謚武莊

張大節五臺人天德中進士調崞縣丞章宗初知太原府閏歲授震武節度使以并代鄉郡故優寵之及致仕仍擢其子

嚴叟忻州刺史以便祿養

以上代州

高懷貞廣陵人大定元年授朝散大夫知保德軍改建文廟於城內西北隅

李晏高平人由進士於大定間除黎城令有治行遷知保德軍修城便汲政平訟理盜賊屏息厯西京副留守沁南昭義兩鎮節度使卒謚文簡大同舊有晏德政碑

張令臣博平人泰和元年授奉議大夫知保德軍提督常平倉事重修文廟殿宇兩廡垣墉補缺像正位次起講堂齋舍庖廚等類有碑記

以上保德州

耶律德元遼人大定間知解州軍事時歲旱綠林之黨嘯聚山谷德元曰先除民害後祈雨澤神必不違密與數騎直造賊穴追捕之賊黨平遂祈雨於五龍祠雨隨降民歌頌之

田特秀京兆人承安間知解州治民以寬繩吏以嚴政暇集州諸生講解亶亶不倦

王庭直壽春人皇統中爲夏縣令文學政事蔚有可觀

以上解州

范承吉字寵之好問學遼天慶八年進士丙科歸金天眷四年從攻太原五年知絳州先是軍興民有爲將士所掠而逃歸者承吉使吏徧諭俾其自實凡數千人具白元帥府許自贖爲良或貧無貲者以公廚代輸六年改河東北路轉運使時承宋季之弊民賦繁重失當承吉爲經畫立法簡便所入增十數萬斛官旣足而民有餘厯同知平陽尹西京副留守遷河東南路轉運使厯鎮西軍節度使致仕卒

高汝礪金城人大定中進士爲石絳二州刺史人謂政事文學可比樊宗師富鄭公後相宣宗號良相卒配享宣廟

梁肅字孟容奉聖州人幼勤學天眷二年擢進士第調平遙
縣主簿遷絳縣令以廉入爲尙書省令史仕至參知政事卒
謚貞憲

張敏富平人登大定四年進士初授解州判官調聞喜令有
惠政民爲立碑

孫鼎臣爲河津令以辟舉入仕清慎明敏才極一時之選號

良吏

以上絳州

施宜生邵武人天德中爲隰州刺史有惠政

王天祐潞州人太常博士進階奉議大夫知隰州穎性疏通
倬才精勵屢議大禮國度以貞厯著治猷民生允殖

劉汲大定間由進士任蒲縣令政平訟簡民物康阜

以上隰州

移刺阿里合遼人與定中爲霍州刺史元兵至戰敗與寶昌

軍節度副使孔祖湯俱被執不跪向闕立元人叢矢射殺之
祖湯亦不屈死

霍州

完顏仲婁室子本名石古乃體貌魁偉通女直契丹漢字世
宗時爲西南路招討使兼天德軍節度使政尙忠信決獄公
平蕃部不敢寇邊召爲左副都點檢終北京留守

完顏蒲查治訶孫領猛安皇統間除開遠軍節度使斥候嚴
整邊境無事大定中再遷開遠軍節度卒蒲查廉潔忠直臨
事能斷凡被任使咸稱其職

以上歸
綏道

右金七十九人

譚澄字彥清懷來人父資榮金末爲交城令以縣來附賜金
符爲元帥左都監仍兼交城今年四十移病舉弟資用自代
資用卒澄襲職澄幼穎敏爲交城令時年十九汾陽郭師遷

文谷水折以理令均其利於民豪民持吏短長察得主名皆以法治之乙未籍民戶有司多以浮客占籍及征賦逃竄殆盡官爲稱貸民無以償澄入覲因中書耶律楚材面陳其害太宗惻然免之王子復大籍民澄盡削交城之土著者賦以時集甲寅留世祖藩府而以其弟山代爲交城令

程元直亳州人至元間爲交城令勸農興學政平訟簡升絳州令以社名官以上太

王明安燕人太祖時選守霍州以忠勤擢爲平陽總管元帥奏留鎮守忠恪不移卓有異政

劉秉恕字長卿秉忠弟至元間歷官平陽路總管歲荒民艱食輒開倉以振之全活者眾卒於官

朶而只西夏人至德間任襄陵有德政民爲立石頌之

也速歹兒東原人大德間知洪洞縣能以文學潤飾吏治

杜英延祐間任曲沃重學育士敬神恤民

郝信臣至順間任太平捐俸濟民有惠政碑存焉

閻得中至正間任曲沃首建社稷壇鼎新文廟惠愛黔黎作
興人材民歌之曰泮宮之崇以扶儒宗社稷之封以祈年豐
肇之者誰令尹之功

馬思忽別以華容縣達魯噶齊

原作達魯噶齊
語解改以下並同調翼城豪

邁以經濟自任公退杜門一無所交雖家人亦不敢以私事
溷嘗值客兵雲合恣侵掠卽闔城門集丁壯禁戢驕橫秋毫
無犯百姓德之後受代北歸邑人驚相謂曰公何來遲而未
速也爭挽留不已爲立碑頌之

楊宜翼城人時元孫任本縣尹縣之東山有炭窟穿斷歲久

惠崩地宜親視其地創爲開置以便民南川水利灌田甚廣
民爭訟不已宜斷理得其平治三十餘年政廉明善謀斷無
少玷闕

沙班敬昇至正十五年以黎城主簿監翼禮士愛民建社學

免其徭役

達魯噶齊設於州者爲
監州設於縣者爲監縣

葉企顏上蔡人至正十九年以統軍元帥行翼城縣尹事撫
慰軍民行伍無庚癸之呼編戶絕追呼之擾遠近懷服有遺
愛焉

按攤不花伊山人至正間薦授岳陽縣達魯噶齊恤刑薄賦
招集流亡惟恐一民失所有政績碑

王元禮至正初任翼城尹開誠心布公道獎善良疾姦愚興
學校有古循吏風

虎篤鐵木兒字伸威館陶人至正中任翼城達魯噶齊政舉民服嘗值春旱躬詣臥龍祠禱雨輒應民立感應碑記之上

平陽府

劉天孚字裕民大名人由中書驛史累官知河中府視事始兩月陝西行省丞相阿思罕舉兵至河中天孚日夜治戰守具選丁壯分守要害阿思罕斂船濟兵遂入城以扼河渡鎖舟楫爲天孚罪欲脅使附已天孚投河死阿思罕籍其家郡人咸哀痛之事平詔其弟天惠給驛以歸其柩贈推誠秉節功臣中奉大夫河東山西道宣慰使護軍彭城郡侯謚忠毅案陝兵從上都諸王輔泰定帝太子其義甚正舊志載天孚言吾家微賤荷朝命至此今不幸遭大變吾何忍從之而負上恩云云所謂朝命上恩不知何指又時方九月而云天寒河水方堅天孚拔刀所冰開其爲飾詞亦可以概見並刊之靳克忠字唐臣潞州人知河中府期年政事修舉西兵至克

忠以忠義自勉誓死禦之或勸少避其鋒曰吾守臣也去
安之城陷公服坐廳事執至也先帖木兒前抗論不屈遂遇
害封郡公

八扎海牙畏兀人自和州轉河中府達嚕噶齊陝西行臺御
史也先帖木兒舉兵應上都軍河西岸海牙與知府靳克忠
極力捍禦相拒旬日統軍者宵遁敵遂自大慶關渡河被執
不屈死於奉元省門之外

護虞實至正間知河中府蒞政二載聲譽籍甚以憂去後爲
河東運使惠愛尤多民爲立碑紀之

董輔卿河中人至正間知猗氏縣田賦徭役任編氓社戶自
相推派行之以公民稱便焉末期政平訟理民爲立碑

姚思聰字達天進士泰定二年知萬泉縣厯任清白治有能

聲所至政平訟理有蝗不入境之異

石正卿泰定四年宰萬泉政尙廉平獄無冤濫後秩滿遷正平尹人爲立石頌之

不古魯歹字守道至正間爲萬泉令民紀其政績於碑祀名宦

胡元真字幹卿知萬泉縣秉性剛直守節清苦豪猾畏威奸諛喪氣有修學記

月輪失帖木兒萬泉令通經重道公廉有爲嘗請免賦以濟

民饑民爲立石頌德

以上蒲州府

周幹臣長清人至元中以河東肅政廉訪司知事守潞州時親王小薛奉命牧馬潞沁間牧人有奪民田爲牧地者幹臣詣王啟其事王令悉還其田潞無賴民好解牛以規利幹臣

作詩化之民罔敢犯者

時恕泰定間知潞州教民興利民多便之

陳伯福後至元間知潞州教民孝弟勤課農桑人咸德之

張景岩河東人至正間知潞州興廢補弊政多可稱

溫珪輔天歷中知潞州有勸課農桑之政

曹璣潞州人知本州有善政

倒刺沙于闐人至元初爲襄垣達魯噶齊有政績民爲勒碑紀之

邳朗肥鄉人至元間任壺關縣政平訟簡整飭學校遇旱蝗禱雨輒應蝗不爲災後升本州同知入名宦

傅仲禮元貞間知襄垣縣甚有惠政民思不忘

陳善屯留人大德二年爲本縣尹拓修廟學肇啟人文明正

山西通志卷一百一
名臣列傳
德六年入祀

郭思敬延祐二年知襄垣縣無私交嘗修學校爲政能令人畏服

白謙延祐間任黎城尹時值大亂後學校荒廢無書籍可讀乃出素所積並廣求四方經史子集凡四千二百餘卷作藏書樓貯之其功在學校甚鉅

楊綱字道紀永年人至順元年知襄垣縣好儒重士創修廟學興利除害士民信服

郭從善至正間爲上黨尹時盜賊縱橫從善能和輯其民整義旅與關保虎林赤犄角破賊保澤潞與有功焉

齊泰至正間長子尹修繕城池表揚耆德

劉依仁淇人至正間尹潞城治效居一時最繼尹屯留尤以

幹濟稱時縣有冤獄依仁一訊辨明之民爲立平冤碑

張鵬翼字大舉河南祥符人至正間爲屯留尹時盜賊徧起能親當矢石爲百姓禦患又以計擒借盜爲奸者禦寇掠供芻米指顧而辦生平謙沖淡薄絕無饋遺上官怒廷爭不屈去民爲立碑

馬復廣平人至正間爲黎城尹適蝗旱復引咎自責禱於神蝗尋去大雨滂沱歲乃有秋黎人立碑紀之

以上節安府

郭琪堅州人孝友明律令達政事用法平允延祐間升知汾州增秩朝列大夫

宋景初任甯鄉令經學淑人德化敷治奸黨震伏善類獲安王翼甫平陽人大德中知平遙縣守已安民去任民思不忘齊思古榆次人至順初知平遙縣愛民如子興利除害境內

安堵去任民有餘思

高本冀甯路人至正間知平遙縣廉以持已仁以愛民鋤強扶弱民安時靖

武弁少通書史十八歲任平遙尹厯官少中大夫

蔡演至正間任甯鄉尹天性挺秀持身清慎政善化洽人皆頌之

楊乘字文載濱州渤海人至正初爲介休縣尹民饑爲盜賊立法招之使自新皆棄兵頓首願爲良民

韓謙河南人至正間知平遙縣公勤廉慎三年如一日被朝命問理賊黨滌除冤濫活者數百家有德政碑

馬麟至正二十六年知臨縣開誠率物制造房舍崇尚學校政績至今賴之

朱守謙河南汝甯人至正間寇入孝義焚劫甚慘守謙由總兵都鎮撫司經歷署孝義縣事撫傷殘恤困苦招徠逃潰者復其業又定團練之規設防禦之略立科差之等開渠堰之利不數月民若更生立石表績

周景福南陽人孟門尹政簡刑清民安物阜嘉禾紀瑞者再

以上汾州府

段直字正卿澤州晉城人至元十一年河北河東賊起直聚鄉黨族屬結壘自保世祖命將略地晉城直以眾歸承制署潞州元帥府右監軍其後論功行賞分土世守命直佩金符爲澤州長官澤民多避兵未歸者直命籍其田廬於親戚隣人之戶且約曰俟業主至當析而歸之後逃民多來還命歸其田廬如約民得安業素無產者則出粟振之爲他郡俘掠

者出財購之兵死暴露者收瘞之未幾澤爲樂土大修孔子廟割田千畝置書萬卷迎儒士李俊民爲師以招延四方來學者不五六年士子以通經被選百二十有二人在官二十一年多惠政特命提舉本州學校事未拜卒子紹隆嗣長官興學校平版籍民多賴之

葉企顏上蔡人至正間以統軍元帥知翼城縣事擢知澤州撫育民生惠澤遠被興學造士茂著聲稱

已見翼城

普顏特穆爾一名布哈至正間爲澤州達嚕噶齊勸課農桑作興學校嚴信牌辨冤抑獄於民教以孝弟節義民多感悅

關世傑字英甫晉甯人至元四年由兩臺掾薦舉爲陽城尹大布恩信勸課農桑講明彝教士民聞風嚮義爲立德政碑

頌之

劉好德至元間爲高平尹有治劇才舉廢墜招流亡重建學廟正祀考曰理殘邑而飭振從宜招遺黎而撫安復業創興黌宮以惇俗而導民蓋得爲政之先務者

李裕大德間以才名薦爲陽城尹初下車卽問民疾苦勸農桑興學校邑人德之祀名宦

韓汝弼字良輔保定人至順元年爲陽城縣尹興廢舉墜汰冗食罷不急變士風善民俗早禱輒應連歲大稔邑人立碑頌之

路有讓字文遠廣平人至正三年爲陽城縣尹有異政崇儒恤貧化行訟簡

趙繩祖字嗣宗燕山人至正十一年爲陽城縣尹立政敷教

恩布威行民懷其德刻碑以頌

陳榮祖密縣人至正間任沁水縣尹時兵戈雲擾百姓匿巖穴中下車首以撫綏爲任示以恩信民漸復業尤留意風教增置學田若干畝

張輔銅鞮人高平教諭至正間擢陵川尹時破頭潘先生自

鄴攻潼關兵臨縣城城陷力竭不屈死

以上澤州府

韓浩宜都元帥兼應州彰國軍節度使善附循士卒一軍傾心又愛護百姓性持正人不敢干以私至今土人猶知有韓元帥云

王居禮字子敬泰定間知應州修學開渠著有善績

米尹宣甯人性敏達知懷仁縣治民有方上官見其能遇疑難事無不委之剖決如神獄皆得情旣去耆老思之爲之立

碑以上大
同府

庫庫春

原作開
唐古

唐元氏世祖時

擢大同廣勝庫達嚕噶

齊廣勝庫者貯兵器之所時總管唐古哈雅以庫作公署置

甲杖虛廩中多被蟲鼠害庫庫春言於上復之使者薛綽布

哈等檄取鷹房軍衣甲弓矢庫庫春實其人文書領去大德

元年升大同路武州達嚕噶齊

甯武府

請都刺字瑞芝凱烈氏通經成宗時除遼州達嚕噶齊以政

聞賜上尊名幣除集賢直學士後遷襄陽路達嚕噶齊山西

大饑河南行省恐流民入境爲變檄守武關諸都刺驗良民

輒聽度關吏曰得毋違上命乎諸都刺曰吾防奸耳非讐良

民可不開其生路耶又煮粥以食之活數萬人

李僕絳州人至元六年任榆社尹直諒廉明篤信和易務德

化不恃刑威二年夏大旱禱於廣靈王崔府君廟暴身烈日
中朝夕拜懇越四日雨衣履盡濕拜祝猶未已四境霑足歲
大熟邑人立石頌焉

王天祐上黨人至元十五年任榆社尹興學勸農政教兼舉
士民戴德焉

秦松齡大德間任榆社尹天資篤實爲政寬平

以上
遼州

杜豐爲沁州長官十餘年寬徭薄賦勸課農桑民以富足請
老卒沁州人立祠祀之

陳思濟字濟民柘城人以才器見稱世祖卽位建省部俾掌
敷奏姚樞許衡皆器重之剛直守正不附權要至元五年拜
監察御史劾阿合馬不法帝命廷臣正之思濟厲聲曰御史
言官也非爲辨訟拂袖而出知沁州簡要不務苛察遷僉河

南江北等處行中書省事卒年七十贈吏部尚書諡文肅

張德鄰字友仁壺關人至元間任沁源尹履正奉公不避權勢除煩苛抑貪鄙武鄉民孫元住以疑盜繫獄援引至數十人上官屬德鄰按問委屈推究元住獲平反議者咸服其明經營成卒擾民以法繩之莫敢犯涖任三年盜患民安受代之日吏民嘆息爲立去思碑聖裔孔克方有記崇祀名宦

廉答失蠻中山人監生久客江淮得性理之學至正初擢武鄉尹居官行政皆本平日所學鋤強扶弱有不吐茹之風去任邑民思之爲立遺愛碑崇祀名宦

李唐臣武鄉人至正六年任本縣尹秉公守正值久旱痛自刻責遂大雨四郊霑足歲稔嘉禾生有一本六穗之異崇祀名宦

張綱武鄉人至正間任本縣尹政教兼施威愛並用嘗謂僚
倖曰牧民者有恤民心恤民言心恤者民信言恤者民疑時
妖氛爲患綱諭以大義遠近不惑崇祀名宦以上
阿兒思蘭海牙平定達嚕噶齊時大旱祈雨有應民立感應
碑

拜住東平王安童之孫至元狀元爲孟州守恭敬仁愛士民
賴之皇慶七年平章政事進左丞相振立紀綱修舉廢墜裁
不急之務杜僥倖之門加惠兵民輕徭薄稅天下晏然祀名
宦以上平定州

居理貞唐兀人承父蔭監管州有政聲

王克義崞州人國子生至正間授平準職轉定襄尹期月治
行民比之龍圖

劉德新洛水人至正間自柘城尹調定襄未期年政理事修
部使者薦於朝民爲立碑頌德

以上忻州

李元鳳汝甯人至正丙午知代州州自戊戌經兵燹後廟學
鞠爲邱墟元鳳下車捐俸修復之聚子弟肄業其中時軍賦
繁急民鮮生聚絃誦不聞者越數年矣人以爲難

完者不花至正中權知堅州撫輯殘民輕徭薄賦甚有治聲
時方營造五臺費皆出自近山州郡兵後州民雕敝弗忍重
援遂與同知韓仲彬議出官錢置水磨取其租值以供應之

一時稱便

以上代州

袁知州失名光州人至正十三年府谷官軍作亂承樞院吳
命撫禦之明年投保德知州凡有糧儲科役造作必躬詣樞
院請省減才畧明敏耆士爲建坊豎碑記之

許仲傑字漢臣長清人至正十三年由毗陵推官以廉能擢知保德州捐俸修州治兼治供奉上官器具及葺砌儒學垣基有碑記以上保德州

鄭公至元間以尙書省宣使守解州清白整肅勸農興學吏民從化嘗禱雨有應

靳用古先爲曲沃尹大德間知解州嚴而不苛境內清肅嘗修山泉之利引流入城愛人利物有碑記頌功

葛榮至元間平陸縣尹重修縣治儒學政績著聞

張式河內人大德間夏縣尹修孔子廟溫公祠

也真不花蒙古人居燕山延祐二年監安邑事性英明蒞政公平洞達經史有綱紀門無私謁不尙華靡所居若寒士獄無不得情鄰壤之氓亦願就質有遺愛碑祀名宦祠

薛信解州人延祐間任解縣尹士庶服化奸邪畏威嘗捐貲修五龍廟爲鄉里祈禱所歷升晉甯路治中壽八十餘程伯啟任平陸尹重建縣治禮士愛民有良吏風戴侯至正元年以陝西省平章保舉監安邑事禁豪強除宿弊值歲凶貸官儲以濟飢民多賴之

普顏不花至正間平陸縣尹天資明敏學問宏裕蒞治一以愛民爲心每遇東作介騎減從自攜乾餼勞民畎畝故室多蓋藏家絃戶誦去後民思慕之爲立遺愛碑

許義夫礪山人爲夏縣尹親詣鄉社教民稼穡見勤謹者出已俸賞之怠惰者罰之三年間境內豐足

辛邦彥汾西人由甯晉榆社主簿調夏縣尹廉惠明察建司馬溫公祠立皋門李綽等堰及常平倉有德政碑

蒲機興元人進士知芮城縣嚴明剛正吏畏民懷罷修池之
夫革石榴之貢開墾荒蕪全活逃亡

王仲文祥符人知夏縣爲政寬簡濟恤孤貧嘗出郊勸農自
齋米煮粥民私增聚數枚食畢乃遺聚於民年老致仕遂家
於夏縣子翰孫汝正俱以文學名

以上解州

靳和曲沃人居鄉喜周貧乏導人以善後仕元知絳州政治
公平

彭仲德東明人至元中知絳州有遺愛碑

李榮祖雲中人至正初知絳州有政績碑

宋克篤長白人至正間進士知絳州時稱其文章政事方文
路公

程元直亳州人初知交城勸農興學政平訟簡人心悅服升

知絳州

已見太原府

岳宏南頓人至元十八年爲垣曲尹治有殊績縣治儒學並景山亭皆其所建

左庫庫春河間東光人大德七年知垣曲縣性廉介好讀書法令嚴明吏民畏服有去思碑

王傑澤州人延祐間任聞喜縣尹均賦康時興學倡化廉幹多著美績

劉尙質曲沃人泰定間任稷山縣尹守已清廉爲政平易後遷翰林院編修擢御史忠直敢言得風憲體引年休致日與學士靳榮題詠邑人以二賢名之

拔思溥化偃師人舉進士知聞喜縣六事備舉政治有聲部使者舉爲守令之最朝廷遣賜宮幣以旌之

葛禪字克敬文安人至正二年任稷山縣尹撫民多方邑樹碑頌之

藥僧唐兀人至正十八年自中書任稷山達魯噶齊才猷過人愛民如子時賊寇逼境邑人大恐欲潰僧與縣尹張名昭主薄法顯祖同心協謀以爲備禦卒賴保全民立碑頌之張名昭順德人至正十八年任稷山縣尹撫民禦賊與藥僧同政

劉履謙至正間以絳判知絳縣政績昭著

徹里特穆爾景州東光人至正十九年任稷山達魯噶齊睦

察宋撫百姓興利革弊政化大行

以上絳州

韓昇隰州人爲本州刺史以策干太師穆呼里授干夫長經畧有功授戶部尙書佩金虎符子夷相繼爲本州刺史

楊思聰知大甯縣政平訟理蝗不入境

以上
隰州

莊欽祖趙城尹禦虜患崇文教政績甚異

冉大年至順間任靈石勤於政事案無留牘暇則巡行郊陌
勸課農桑民甚德之鼎建孔子廟於靜昇村今塑像俱存上

霍州

楊克公河間景州人至正四年任興州知州革弊平訟吏民

思之祀名宦

以下
補遺

齊元彝樂城人至正間知興州撫字有方流移者咸復其業
民爲立石

楊致道清苑人天曆二年由西河主簿升文水縣令蒞任五
載清潔善撫字爲諸縣最

程克明禹城人榆次尹下車首詢民瘼修舉惠政會歲饑勸

富室出粟賑之所全活甚眾

張儉大同人延祐間自秀容主簿遷榆次尹爲政公平斷獄明允旁邑訟有不直者咸來質成尤能以善迪人而喻以愛親敬長之道百姓愛之立德政碑

月輪失帖木兒延祐間治太谷公廉有爲嘗請免太谷協濟

庶民爲立碑頌德

已見蒲州府

齊思恭大名路人先爲國子助教元統間尹榆次治政嚴明橐猾斂跡邑人愛慕久而不衰

侯洪字有容太原人舉進士初爲離石判官進尹榆次廉直無私遇事立決雖簿書纖悉不遺祀名宦

劉鏞忻州人至正間令榆次以儒飾吏筆翰如流時巨寇劉入忽等自陝至潛出邑境鏞察其有異收之果服人以爲神

代去民爲立石頌之

並太原府

牛天麟恒山人元貞年任鄉甯縣重建文廟作興學校

王元士字堯佐恩州人至正四年以進士任吉州知州爲政

不苛士民咸戴祀名宦

並平陽府

袁士廉知壽陽縣創築城垣有功民社

平定州

右元一百二十七人

山西通志卷一百六

山西通志卷一百六

名宦錄六

五